

老子

(陳鼓應校定)



一章

道可道，非常道；名可名，非常名。
無，名天地之始；有，名萬物之母。

故常無，欲以觀其妙；常有，欲以觀其
徼。

此兩者，同出而異名，同謂之玄。玄之
又玄，眾妙之門。

二章

天下皆知美之為美，斯惡已；皆知善之
為善，斯不善已。

有無相生，難易相成，長短相形，高下
相盈，音聲相和，前後相隨。

是以聖人處無為之事，行不言之教；萬
物作而不為始，生而不有，為而不恃，功成
而弗居。夫唯弗居，是以不去。

三章

不尚賢，使民不爭；不貴難得之貨，使民不為盜；不見可欲，使民不亂。

是以聖人之治，虛其心，實其腹，弱其志，強其骨。常使民無知無欲。使夫智者不敢為也。為無為，則無不治。

四章

道沖，而用之或不盈。淵兮，似萬物之宗；湛兮，似或存。吾不知誰之子，象帝之先。

五章

天地不仁，以萬物為芻狗；聖人不仁，以百姓為芻狗。

天地之間，其猶橐籥乎？虛而不屈，動而愈出。

多言數窮，不如守中。

六章

谷神不死，是謂玄牝。玄牝之門，是謂天地根。縣縣若存，用之不勤。

七章

天長地久。天地所以能長且久者，以其不自生，故能長生。

是以聖人後其身而身先；外其身而身存。非以其無私邪？故能成其私。

八章

上善若水。水善利萬物而不爭，處眾人之所惡，故幾於道。

居善地，心善淵，與善仁，言善信，政善治，事善能，動善時。夫唯不爭，故無尤。

九章

持而盈之，不如其已；
揣而銳之，不可長保。
金玉滿堂，莫之能守；
富貴而驕，自遺其咎。
功遂身退，天之道也。

十章

載營魄抱一，能無離乎？
專氣致柔，能如嬰兒乎？
滌除玄覽，能無疵乎？

愛民治國，能無為乎？
天門開闔，能為雌乎？
明白四達，能無知乎？

十一章

三十輻，共一轂，當其無，有車之用。
埴埴以為器，當其無，有器之用。
鑿戶牖以為室，當其無，有室之用。
故有之以為利，無之以為用。

十二章

五色令人目盲；五音令人耳聾；五味令
人口爽；馳騁畋獵，令人心發狂；難得之貨，
令人行妨。

是以聖人為腹不為目，故去彼取此。

十三章

寵辱若驚，貴大患若身。

何謂寵辱若驚？寵為下，得之若驚，失之若驚，是謂寵辱若驚。

何謂貴大患若身？吾所以有大患者，為吾有身，及吾無身，吾有何患？

故貴以身為天下，若可寄天下；愛以身為天下，若可託天下。

十四章

視之不見，名曰『夷』；聽之不聞，名曰『希』；搏之不得，名曰『微』。此三者不可致詰，故混而為一。其上不皁，其下不昧。繩繩兮不可名，復歸於無物。是謂無狀之狀，無物之象，是謂惚恍。迎之不見其首，隨之不見其後。

執古之道，以御今之有。能知古始，是謂道紀。

十五章

古之善為士者，微妙玄通，深不可識。
夫唯不可識，故強為之容：

豫兮若冬涉川；

猶兮若畏四鄰；

儼兮其若客；

渙兮其若釋；

敦兮其若樸；

曠兮其若谷；

混兮其若濁；

孰能濁以靜之徐清？孰能安以動之徐
生？

保此道者，不欲盈。夫唯不盈，故能蔽
而新成。

十六章

致虛極，守靜篤。

萬物並作，吾以觀復。

夫物芸芸，各復歸其根。歸根曰靜，靜曰復命。復命曰常，知常曰明。不知常，妄作凶。

知常容，容乃公，公乃全，全乃天，天乃道，道乃久，沒身不殆。

十七章

太上，不知有之；其次，親而譽之；其次，畏之；其次，侮之。信不足焉，有不信焉。

悠兮其貴言。功成身遂，百姓皆謂：『我自然。』

十八章

大道廢，有仁義；六親不和，有孝慈；

國家昏亂，有忠臣。

十九章

絕智棄辯，民利百倍；絕偽棄詐，民復孝慈；絕巧棄利，盜賊無有。此三者以為文，不足。故令有所屬：見素抱樸，少私寡欲。

二十章

絕學無憂。唯之與阿，相去幾何？美之與惡，相去若何？人之所畏，不可不畏。

荒兮，其未央哉！

眾人熙熙，如享太牢，如春登臺。

我獨泊兮，其未兆，如嬰兒之未孩；

儻儻兮，若無所歸。

眾人皆有餘，而我獨若遺。我愚人之心也哉！沌沌兮。

俗人昭昭，我獨昏昏。

俗人察察，我獨悶悶。

澹兮其若海，颺兮若無止。

眾人皆有以，而我獨頑且鄙。

我獨異於人，而貴食母。

二十一章

孔德之容，惟道是從。

道之為物，惟恍惟惚。惚兮恍兮，其中有象；恍兮惚兮，其中有物。窈兮冥兮，其中有精；冥兮窈兮，其中有信。

自今及古，其名不去，以閱眾甫。吾何以知眾甫之狀哉！以此。

二十二章

曲則全，枉則直，窪則盈，敝則新，少則得，多則惑。

是以聖人執一為天下式。不自見，故

明；不自是，故彰；不自伐，故有功；不自矜，故能長。

夫唯不爭，故天下莫能與之爭。古之所謂『曲則全』者，豈虛言哉！誠全而歸之。

二十三章

希言自然。

故飄風不終朝，驟雨不終日。孰為此者？天地。天地尚不能久，而況於人乎？故從事於道者，同於道；德者，同於德；失者，同於失。

同於德者，道亦德之；同於失者，道亦失之。

二十四章

企者不立；跨者不行；自見者不明；自是者不彰；自伐者無功；自矜者不長。

其在道也，曰：餘食贅形。物或惡之，故有道者不處。

二十五章

有物混成，先天地生。寂兮寥兮，獨立不改，周行而不殆，可以為天下母。吾不知其名，強字之曰『道』，強為之名曰『大』。大曰逝，逝曰遠，遠曰反。

故道大，天大，地大，人亦大。域中有四大，而人居其一焉。

人法地，地法天，天法道，道法自然。

二十六章

重為輕根，靜為躁君。

是以君子終日行不離輜重。雖有榮觀，燕處超然。奈何萬乘之主，而以身輕天下？輕則失根，躁則失君。

二十七章

善行無轍跡；善言無瑕謫；善數不用籌策；善閉無關楗而不可開；善結無繩約而不可解。

是以聖人常善救人，故無棄人；常善救物，故無棄物。是謂襲明。

故善人者，不善人之師；不善人者，善人之資。不貴其師，不愛其資，雖智大迷，是謂要妙。

二十八章

知其雄，守其雌，為天下谿。為天下谿，常德不離，復歸於嬰兒。

知其白，守其辱，為天下谷。為天下谷，常德乃足，復歸於樸。

樸散則為器，聖人用之，則為官長，故

大制不割。

二十九章

將欲取天下而為之，吾見其不得已。天下神器，不可為也，不可執也。為者敗之，執者失之。是以聖人無為，故無敗；無執，故無失。

故物或行或隨；或噓或吹；或強或贏；或培或墮。

是以聖人去甚，去奢，去泰。

三十章

以道佐人主者，不以兵強天下。其事好還。師之所處，荊棘生焉。

善有果而已，不以取強。果而勿矜，果而勿伐，果而勿驕，果而不得已，果而勿強。物壯則老，是謂不道，不道早已。

三十一章

夫兵者，不祥之器，物或惡之，故有道者不處。

君子居則貴左，用兵則貴右。兵者不祥之器，非君子之器，不得已而用之，恬淡為上。勝而不美，而美之者，是樂殺人。夫樂殺人者，則不可得志於天下矣。

吉事尚左，凶事尚右。偏將軍居左，上將軍居右，言以喪禮處之。殺人之眾，以悲哀泣之，戰勝以喪禮處之。

三十二章

道常無名樸。雖小，天下莫能臣。侯王若能守之，萬物將自賓。

天地相合，以降甘露，民莫之令而自均。始制有名，名亦既有，夫亦將知止，知

止可以不殆。

譬道之在天下，猶川谷之於江海。

三十三章

知人者智，自知者明。

勝人者有力，自勝者強。

知足者富。

強行者有志。

不失其所者久。

死而不亡者壽。

三十四章

大道汜兮，其可左右。萬物恃之以生而不辭，功成而不有。衣養萬物而不為主，可名於小；萬物歸焉而不為主，可名為大。以其終不自為大，故能成其大。

三十五章

執大象，天下往。往而不害，安平太。
樂與餌，過客止。道之出口，淡乎其無味，視之不足見，聽之不足聞，用之不足既。

三十六章

將欲歛之，必固張之；將欲弱之，必固強之；將欲廢之，必固舉之；將欲取之，必固與之。是謂微明。

柔弱勝剛強。魚不可脫于淵，國之利器不可以示人。

三十七章

道常無為而無不為。侯王若能守之，萬

物將自化。化而欲作，吾將鎮之以無名之樸。無名之樸，夫亦將不欲。不欲以靜，天下將自正。

三十八章

上德不德，是以有德；下德不失德，是以無德。

上德無為而無以為；上仁為之而無以為；上義為之而有以為。上禮為之而莫之應，則攘臂而扔之。

故失道而後德，失德而後仁，失仁而後義，失義而後禮。

夫禮者，忠信之薄，而亂之首。

前識者，道之華，而愚之始。是以大丈夫處其厚，不居其薄；處其實，不居其華。故去彼取此。

三十九章

昔之得一者：天得一以清；地得一以寧；神得一以靈；谷得一以盈；萬物得一以生；侯王得一以為天下正。

其致之也，謂天無以清，將恐裂；地無以寧，將恐廢；神無以靈，將恐歇；谷無以盈，將恐竭；萬物無以生，將恐滅；侯王無以正，將恐蹶。

故貴以賤為本，高以下為基。是以侯王自稱孤、寡、不穀。此非以賤為本邪？非乎？故至譽無譽。是故不欲碌碌如玉，珞珞如石。

四十章

反者道之勤；弱者道之用。
天下萬物生於有，有生於無。

四十一章

上士聞道，勤而行之；中士聞道，若存若亡，下士聞道，大笑之。不笑不足以為道。故建言有之：

明道若昧；

進道若退；

夷道若類；

上德若谷；

大白若辱；

廣德若不足；

建德若偷；

質真若渝；

大方無隅；

大器晚成；

大音希聲；

大象無形；

道隱無名。

夫唯道，善貸且成。

四十二章

道生一，一生二，二生三，三生萬物。
萬物負陰而抱陽，沖氣以為和。

人之所惡，唯孤、寡、不穀，而王公以為稱。故物或損之而益，或益之而損。人之所教，我亦教之。強梁者不得其死，吾將以為教父。

四十三章

天下之至柔，馳騁天下之至堅。無有入無間，吾是以知無為之有益。

不言之教，無為之益，天下希及之。

四十四章

名與身孰親？身與貨孰多？得與亡孰病？

甚愛必大費；多藏必厚亡。

故知足不辱，知止不殆，可以長久。

四十五章

大成若缺，其用不弊。
大盈若沖，其用不窮。
大直若屈，大巧若拙，大辯若訥。
躁勝寒，靜勝熱。清靜為天下正。

四十六章

天下有道，卻走馬以糞。天下無道，戎馬生於郊。

咎莫大於欲得；禍莫大於不知足。故知足之足，常足矣。

四十七章

不出戶，知天下；不闚牖，見天道。其出彌遠，其知彌少。

是以聖人不行而知，不見而明，不為而成。

四十八章

為學日益，為道日損。損之又損，以至於無為。

無為而無不為。取天下常以無事，及其有事，不足以取天下。

四十九章

聖人常無心，以百姓心為心。

善者，吾善之；不善者，吾亦善之；德善。不善者，吾亦善之；德

信者，吾信之；不信者，吾亦信之；德信。

聖人在天下，歛歛焉，為天下渾其心，百姓皆注其耳目，聖人皆孩之。

五十章

出生入死。生之徒，十有三；死之徒，十有三；人之生生，動之於死地，亦十有三。夫何故？以其生生之厚。

蓋聞善攝生者，陸行不遇兕虎，入軍不被甲兵；兕無所投其角，虎無所用其爪，兵無所容其刃。夫何故？以其無死地。

五十一章

道生之，德畜之，物形之，勢成之。

是以萬物莫不尊道而貴德。

道之尊，德之貴，夫莫之命而常自然。

故道生之，德畜之；長之育之；亭之毒之；養之覆之。生而不有，為而不恃，長而

不宰。是謂『玄德』。

五十二章

天下有始，以為天下母。既得其母，以知其子；既知其子，復守其母，沒身不殆。

塞其兌，閉其門，終身不勤。開其兌，濟其事，終身不救。

見小曰明，守柔曰強。用其光，復歸其明，無遺身殃；是為襲常。

五十三章

使我介然有知，行于大道，唯施是畏。大道甚夷，而人好徑。朝甚除，田甚蕪，倉甚虛；服文綵，帶利劍，厭飲食，財貨有餘；是謂盜夸。非道也哉！

五十四章

善建者不拔，善抱者不脫，子孫以祭祀不輟。

修之於身，其德乃真；修之於家，其德乃餘；修之於鄉，其德乃長；修之於邦，其德乃豐；修之於天下，其德乃普。

故以身觀身，以家觀家，以鄉觀鄉，以邦觀邦，以天下觀天下。吾何以知天下然哉？以此。

五十五章

含德之厚，比於赤子。蜂虿虺蛇不螫，攫鳥猛獸不搏。骨弱筋柔而握固。未知牝牡之合而媵作，精之至也。終日號而不嘎，和之至也。

知和曰常，知常曰明。益生日祥。心使氣日強。物壯則老，謂之不道，不道早已。

五十六章

知者不言，言者不知。

塞其兌，閉其門，挫其銳，解其紛，和其光，同其塵，是謂『玄同』。故不可得而親，不可得而疏；不可得而利，不可得而害；不可得而貴，不可得而賤。故為天下貴。

五十七章

以正治國，以奇用兵，以無事取天下。吾何以知其然哉？以此：

天下多忌諱，而民彌貧；人多利器，國家滋昏；人多伎巧，奇物滋起；法令滋彰，盜賊多有。

故聖人云：『我無為，而民自化；我好靜，而民自正；我無事，而民自富；我無欲，而民自樸。』』

五十八章

其政悶悶，其民淳淳；其政察察，其民缺缺。

禍兮，福之所倚；福兮，禍之所伏。孰知其極？其無正也。正復為奇，善復為妖。人之迷，其日固久。

是以聖人方而不割，廉而不劌，直而不肆，光而不耀。

五十九章

治人事天，莫若嗇。

夫唯嗇，是謂早服；早服謂之重積德；重積德則無不克；無不克則莫知其極；莫知其極，可以有國；有國之母，可以長久；是謂深根固柢，長生久視之道。

六十章

治大國，若烹小鮮。

以道莅天下，其鬼不神；非其鬼不神，其神不傷人；非其神不傷人，聖人亦不傷人。夫兩不相傷，故德交歸焉。

六十一章

大邦者下流，天下之牝，天下之交也。牝常以靜勝牡，以靜為下。

故大邦以下小邦，則取小邦；小邦以下大邦，則取大邦。故或下以取，或下而取。大邦不過欲兼畜人，小邦不過欲入事人。夫兩者各得所欲，大者宜為下。

六十二章

道者萬物之奧。善人之寶，不善人之所保。

美言可以市，尊行可以加人。人之不善，何棄之有？故立天子，置三公，雖有拱璧以先駟馬，不如坐進此道。

古之所以貴此道者何？不曰：求以得，有罪以免邪？故為天下貴。

六十三章

為無為，事無事，味無味。

大小多少，圖難於其易，為大於其細；天下難事，必作於易，天下大事，必作於細。是以聖人終不為大，故能成其大。

夫輕諾必寡信，多易必多難。是以聖人猶難之，故終無難矣。

六十四章

其安易持，其未兆易謀。其脆易泮，其微易散。為之於未有，治之於未亂。

合抱之木，生於毫末；九層之台，起於累土；千里之行，始於足下。

民之從事，常于幾成而敗之。慎終如始，則無敗事。

是以聖人欲不欲，不貴難得之貨；學不學，復眾人之所過，以輔萬物之自然而不敢焉。

六十五章

古之善為道者，非以明民，將以愚之。

民之難治，以其智多。故以智治國，國之賊；不以智治國，國之福。

知此兩者亦稽式。常知稽式，是謂『玄德』。玄德深矣，遠矣，與物反矣，然後乃至大順。

六十六章

江海之所以能為百谷王者，以其善下之，故能為百谷王。

是以聖人欲上民，必以言下之；欲先民，必以身後之。是以聖人處上而民不重，處前而民不害。是以天下樂推而不厭。以其不爭，故天下莫能與之爭。

六十七章

天下皆謂我：『道大，似不肖。』夫唯大，故似不肖。若肖，久矣其細也夫！

我有三寶，持而保之。一曰慈，二曰儉，三曰不敢為天下先。

慈故能勇；儉故能廣；不敢為天下先，故能成器長。

今舍慈且勇；舍儉且廣；舍後且先；死矣！

夫慈，以戰則勝，以守則固。天將救之，

以慈衛之。

六十八章

善為士者，不武；善戰者，不怒；善勝敵者，不與；善用人者，為之下。是謂不爭之德，是謂用人，是謂配天，古之極也。

六十九章

用兵有言：『吾不敢為主，而為客；不敢進寸，而退尺。』是謂行無行；攘無臂；扔無敵；執無兵。

禍莫大於輕敵，輕敵幾喪吾寶。
故抗兵相若，哀者勝矣。

七十章

吾言甚易知，甚易行。天下莫能知，莫能行。

言有宗，事有君。夫唯無知，是以不我知。

知我者希，則我者貴。是以聖人被褐懷玉。

七十一章

知不知，尚矣；不知知，病也。聖人不病，以其病病。夫唯病病，是以不病。

七十二章

民不畏威，則大威至。

無狎其所居，無厭其所生。夫唯不厭，是以不厭。

是以聖人自知不自見；自愛不自貴。故

去彼取此。

七十三章

勇於敢則殺，勇於不敢則活。此兩者，或利或害。天之所惡，孰知其故？

天之道，不爭而善勝，不言而善應，不召而自來，緘然而善謀。天網恢恢，疏而不失。

七十四章

民不畏死，奈何以死懼之？若使民常畏死，而為奇者，吾將得而殺之，孰敢？

常有司殺者殺。夫代司殺者殺，是謂代大匠斲。夫代大匠斲者，希有不傷其手矣。

七十五章

民之饑，以其上食稅之多，是以饑。
民之難治，以其上之有為，是以難治。
民之輕死，以其上求生之厚，是以輕死。
夫唯無以生為者，是賢於貴生。

七十六章

人之生也柔弱，其死也堅強。
草木之生也柔脆，其死也枯槁。
故堅強者死之徒，柔弱者生之徒。
是以兵強則滅，木強則折。
強大處下，柔弱處上。

七十七章

天之道，其猶張弓與？高者抑之，下者舉之；有餘者損之，不足者補之。
天之道，損有餘而補不足。人之道，則

不然，損不足以奉有餘。

孰能有餘以奉天下，唯有道者。

是以聖人為而不恃，功成而不處，其不欲見賢。

七十八章

天下莫柔弱于水，而攻堅強者莫之能勝，以其無以易之。

弱之勝強，柔之勝剛，天下莫不知，莫能行。

是以聖人云：『受國之垢，是謂社稷主；受國不祥，是為天下王。』正言若反。

七十九章

和大怨，必有餘怨；報怨以德，安可以為善？

是以聖人執左契，而不責於人。有德司

契，無德司徹。
天道無視，常與善人。

八十章

小國寡民。使有什伯人之器而不用；使民重死而不遠徙。雖有舟輿，無所乘之，雖有甲兵，無所陳之。使民復結繩而用之。甘其食，美其服，安其居，樂其俗。鄰國相望，雞犬之聲相聞，民至老死，不相往來。

八十一章

信言不美，美言不信。
善者不辨，辯者不善。
知者不博，博者不知。
聖人不積，既以為人已愈有，既以與人己愈多。

天之道，利而不害；聖人之道，為而不爭。

注释（据陈鼓应《老子今注今译》）

二章：

『前后相随』亦有版本作『前后相随，恒也』。

『生而不有，为而不恃』亦有版本作『生而弗有，为而弗恃』。

四章：

『似万物之宗』后『挫其锐，解其纷，和其光，同其尘』疑为五十六章错简重出，故略。

七章：

『故能长生』亦有版本作『故能长久』。

九章：

『功遂身退』亦有版本作『功成，名遂，身退』。

十章：

『玄览』亦作『玄鉴』。

章末『生之畜之。生而不有，为而不恃，长而不宰，是谓「玄德」。』疑为五十一章错简重出，故略。

十五章：

『涣兮其若释』亦有版本作『涣兮若冰之将释』、『涣呵其若凌释』，『凌』、『冰』同义。无『冰』字，上下句句式一律，为优。

『混兮其若浊』后『澹兮其若海，颺兮若无止』疑为二十章错简重出，故略。

『孰能浊以静之徐清？孰能安以动之徐生？』亦有版本无『孰能』二字。

十六章：

『公乃全』亦有版本作『公乃王』，『王』字应为『全』字缺坏所误，当为『全』。

十七章：

『太上，不知有之』亦作『太上，下知有之』，前者意义较为深长，取此。

十九章：

『绝伪弃诈』亦有版本作『绝仁弃义』，当取前者。

二十一章：

『其精甚真，其中有信』疑为『冥兮窈兮，其中有信』，后者与上文相应，故取之。

『自今及古』亦有版本作『自古及今』，前者意、韵俱优，当为是。

『以阅众甫』亦有版本作『以阅众父』。

二十二章：

『执一』亦有版本作『抱一』，前者为道家常用语，此为宜。

二十三章：

章末一段『信不足焉，有不信焉』已见于十七章，疑为错简重出，故略。

二十四章：

『赘形』亦有版本作『赘行』，『形』与『行』古字相通，但『赘行』易生误解，故取『赘形』。

二十六章：

『轻则失根』亦有版本作『轻则失本』、『轻则失臣』。『轻则失本』可通，『轻则失臣』则误。『轻则失根』与首句相应，故取此。

二十八章：

『知其白』后『守其黑』，为天下式。为天下式，常德不忒，复归于无极。知其荣』，此疑为后人所窜入。《庄子·天下篇》引曰『知其白，守其辱，为天下谷。』此应《老子》原文，本以『雌』对『雄』，以『辱』对『白』。四十一章『大白若辱』亦可为证。

二十九章：

『不可执也』，亦有版本无此句，补之为宜。

三十章：

『荆棘生焉』后『大军之后，必有凶年。』当舍为宜。

三十一章：

『夫兵者』亦有版本作『夫佳兵者』，后者不成文义。

『悲哀』亦有版本作『哀悲』，前者为宜。

三十二章：

『道常无名朴。』亦作『道常无名、朴。』

三十四章：

『衣养万物而不为主』后『常无欲』当略，上下则成对文。

三十五章：

『安平太』亦作『安平泰』。

三十六章：

『将欲废之』亦有版本作『将欲去之』。

『必固举之』亦有版本作『必固兴之』、『必固与之』。

三十八章：

『上德无为而无以为』后『下德无为而有以为』，疑为衍文，当略。

三十九章：

『为天下正』亦有版本作『为天下贞』。『贞』，正也。

『侯王无以正』，亦有版本作『侯王无以贵高』、『侯王无以贞』。『贵高』当为误。

四十五章：

『为天下正』亦有版本作『为天下定』。

四十七章：

『不见而明』原作『不见而名』，据蒋锡昌说改。

四十九章：

『常无心』亦有版本作『无常心』，前者为宜。

五十章：

『人之生生』亦有版本作『人之生』，前者意为『过分地奉养生命』，此为宜。

五十一章：

『势成之』亦有版本作『器成之』。

五十二章：

『袭常』亦有版本作『习常』。

五十三章：

『而人好径』原作『而民好径』，『人』当指人君，按下文义及众说而改。

五十六章：

『知者不言，言者不知』亦有版本作『智之者弗言，言之者弗智』。

五十七章：

『人多利器』亦有版本作『民多利器』，前者为宜，盖『天下多忌讳』、『人多利器』、『人多伎巧』、『法令滋彰』，皆指人主而言。

五十九章：

『早服』亦有版本作『早备』。

六十一章：

『天下之牝，天下之交也』亦有版本作『天下之交，天下之牝』。

六十二章：

『求以得』亦有版本作『以求得』，前者为宜。

六十三章：

『大小多少』后『报怨以德』疑为七十九章文，故略。

六十四章：

『始于足下』后，另有一段『为者败之，执者失之。是以圣人无为故无败，无执故无失。』与上文意不相联，疑为别文，故略。

六十七章：

『天下皆谓我：「道大，似不肖。」夫唯大，故似不肖。若肖，久矣其细也夫！』与下文意义不相应，疑为错简。

七十三章：

『孰知其故』后『是以圣人犹难之』为六十三章文重出，故略。

八十章：

『不远徙』亦有版本作『远徙』，即把迁徙看成很远而不应做的事，则『重』与『远』为对文，皆为动词。